

41-bob. Bojxona rasmiylashtiruvi bo'yicha mutaxassis

284-modda. Bojxona rasmiylashtiruvi bo'yicha mutaxassisga qo'yiladigan talablar

Bojxona brokeri yoxud boshqa yuridik shaxs bilan mehnat shartnomasi tuzgan va ushbu yuridik shaxs nomidan bojxona rasmiylashtiruvi bo'yicha ish bajaradigan O'zbekiston Respublikasi jismoniy shaxsi bojxona rasmiylashtiruvi bo'yicha mutaxassisdir.

(284-modda matni O'zbekiston Respublikasining 2018-yil 3-oktabrdagi O'RQ-494-sonli Qonuni tahririda — Qonun hujjatlari ma'lumotlari milliy bazasi, 04.10.2018-y., 03/18/494/1992-son)

(285-modda O'zbekiston Respublikasining 2018-yil 3-oktabrdagi O'RQ-494-sonli Qonuniga asosan o'z kuchini yo'qotgan — Qonun hujjatlari ma'lumotlari milliy bazasi, 04.10.2018-y., 03/18/494/1992-son)

286-modda. Bojxona rasmiylashtiruvi bo'yicha mutaxassisning huquqlari

Bojxona rasmiylashtiruvi bo'yicha mutaxassis o'z faoliyatini amalga oshirayotganda quyidagi huquqlarga ega:

a) deklaratsiyalanayotgan tovarlarning va (yoki) transport vositalarining bojxona rasmiylashtiruvida, tovarlarning namunalari va nusxalari olinayotganda hozir bo'lish;

b) deklaratsiyalanayotgan tovarlarni va (yoki) transport vositalarini bojxona nazorati ostida ko'zdan kechirishni, ularni tarozida tortishni va boshqacha tarzda ularning miqdorini

aniqlashni amalga oshirish, shuningdek bojxona organining ruxsati bilan tovarlarning namunalari va nusxalarini olish;

v) tovarlardan olingan namunalar va nusxalarning bojxona organlari tomonidan o'tkazilgan bojxona ekspertizasi (tekshiruv) natijalari bilan tanishish;

g) bojxona rasmiylashtiruv bo'yicha operatsiyalarni bajarish uchun bojxona nazorati zonasiga kirish;

d) bojxona masalalari bo'yicha bojxona organlaridan belgilangan tartibda ma'lumotlar va maslahatlar olish;

(286-moddaning birinchi qismi "e" kichik bandi O'zbekiston Respublikasining 2018-yil 3-oktabrdagi O'RQ-494-sonli Qonuniga asosan chiqarilgan — Qonun hujjatlari ma'lumotlari milliy bazasi, 04.10.2018-y., 03/18/494/1992-son)

Dastlabki operatsiyalar amalga oshirilayotganda bojxona rasmiylashtiruv bo'yicha mutaxassis quyidagi huquqlarga ham ega:

a) deklarantning yoki vakolatli shaxsning tovarlarni va (yoki) transport vositalarini bojxona hududidan olib chiqish niyati to'g'risida bojxona organlarini xabardor qilish;

b) dastlabki operatsiyalar amalga oshirilayotganda bojxona maqsadlari uchun zarur bo'ladigan hujjatlarning loyihalarini tayyorlash;

v) deklaratsiyalanadigan tovarlarni va (yoki) transport vositalarini bojxona omborlariga bojxona nazorati ostida joylashtirish.

Bojxona rasmiylashtiruv bo'yicha mutaxassis qonun hujjatlariga muvofiq boshqa huquqlarga ham ega bo'lishi mumkin.

287-modda. Bojxona rasmiylashtiruvi bo'yicha mutaxassisning majburiyatlari

Bojxona rasmiylashtiruvi bo'yicha mutaxassisning majburiyatlariga quyidagilar kiradi:

a) vakolatli shaxsdan olingan, bojxona maqsadlari uchun zarur bo'lgan hujjatlar va ma'lumotlarning bojxona to'g'risidagi qonun hujjatlari talablariga muvofiqligini tekshirish hamda ularni tahlil qilish, shuningdek vakolatli shaxsning tovarlarga va (yoki) transport vositalariga nisbatan vakolatlarini tekshirish;

b) tovarlarni deklaratsiyalash va bojxona maqsadlari uchun zarur bo'lgan tovarlar to'g'risidagi hujjatlarni berish;

v) tovarlarni to'g'ri deklaratsiyalash, shu jumladan:

bojxona to'lovlarini to'g'ri hisoblash;

tovarlarni O'zbekiston Respublikasi Tashqi iqtisodiy faoliyatining tovar nomenklaturasiga muvofiq bojxona maqsadlari uchun to'g'ri tasniflash;

tovarlar ishlab chiqarilgan mamlakatni to'g'ri ko'rsatish;

tovarlarning miqdorini to'g'ri ko'rsatish;

tovarlarning bojxona qiymatini to'g'ri aniqlash;

g) bojxona rasmiylashtiruvini amalga oshirish va bojxona nazoratini o'tkazish uchun zarur bo'lgan hujjatlarni hamda qo'shimcha ma'lumotlarni bojxona organiga o'z vaqtida taqdim etish;

d) deklaratsiyalanayotgan tovarlarga va transport vositalariga nisbatan veterinariya, fitosanitariya nazorati va davlat nazoratining boshqa turlari tugallanganligini qonun hujjatlarida belgilangan hollarda tekshirish;

e) deklarantdan olingan axborotdan faqat bojxona maqsadlari uchun foydalanish;

j) tovarlarni jo‘natuvchidan, ularni qabul qiluvchidan olingan, davlat sirlarini yoki qonun bilan qo‘riqlanadigan boshqa sirni tashkil etuvchi axborotni oshkor etmaslik, undan shaxsiy maqsadlar uchun foydalanmaslik, bundan qonun hujjatlarida nazarda tutilgan hollar mustasno;

z) vakolatli shaxsga bojxona to‘g‘risidagi qonun hujjatlari talablarini tushuntirish;

i) bojxona identifikatsiyalash vositalari o‘zgarganligi, buzilganligi, yo‘q qilinganligi yoki yo‘qotilganligi, idishlari va o‘rovlari buzilganligi, tovarlarning transport, tijorat hujjatlarida va boshqa hujjatlarda ko‘rsatilgan ma’lumotlarga muvofiq emasligi va bojxona ishiga taalluqli bo‘lgan boshqa shunday holatlar aniqlangan taqdirda bojxona organlarini zudlik bilan xabardor qilish;

k) deklaratsiyalanadigan tovarlarning va transport vositalarining bojxona rasmiylashtiruvi uchun bojxona ko‘rigini o‘tkazishda bojxona organining talabiga ko‘ra ishtirok etish;

(287-moddaning birinchi qismi “l” kichik bandi O‘zbekiston Respublikasining 2018-yil 3-oktabrdagi O‘RQ-494-sonli Qonuniga asosan chiqarilgan — Qonun hujjatlari ma’lumotlari milliy bazasi, 04.10.2018-y., 03/18/494/1992-son)

(287-moddaning birinchi qismi “m” kichik bandi O‘zbekiston Respublikasining 2018-yil 3-oktabrdagi O‘RQ-494-sonli Qonuniga asosan chiqarilgan — Qonun hujjatlari ma’lumotlari milliy bazasi, 04.10.2018-y., 03/18/494/1992-son)

Tovarlarni tasarruf etish huquqi berilgan taqdirda bojxona rasmiylashtiruvi bo‘yicha mutaxassis:

bojxona ko‘rigi va rasmiylashtiruvi uchun tovarlarni bojxona organining talabiga ko‘ra taqdim etishi;

tanlangan bojxona rejimiga muvofiq bojxona rasmiylashtiruvi yakunlanmagan tovarlarga nisbatan ulardan foydalanish va ularni tasarruf etish bo‘yicha shartlarga va cheklovlarga rioya etishi;

deklarantning majburiyatlarini bajarishi va tovarlarni bojxona chegarasi orqali o‘zi mustaqil olib o‘tganidagi kabi javobgarlikni o‘z zimmasiga olishi shart.

Bojxona rasmiylashtiruvi bo‘yicha mutaxassisning zimmasida qonun hujjatlariga muvofiq boshqa majburiyatlar ham bo‘lishi mumkin.

288-modda. Bojxona rasmiylashtiruvi bo‘yicha mutaxassis faoliyati ustidan nazoratni amalga oshirish tartibi

Bojxona rasmiylashtiruvi bo‘yicha mutaxassis faoliyati ustidan bojxona organlari tomonidan nazorat bevosita bojxona rasmiylashtiruvi jarayonida amalga oshiriladi.

Bojxona brokeri yoki o‘z shtatida bojxona rasmiylashtiruvi bo‘yicha mutaxassis mavjud bo‘lgan boshqa yuridik shaxs bojxona rasmiylashtiruvi bo‘yicha mutaxassisning bojxona organlariga nisbatan majburiyatlarini cheklashi mumkin emas.

Bojxona rasmiylashtiruvi bo‘yicha mutaxassis va bojxona brokeri yoki boshqa yuridik shaxs o‘rtasidagi munosabatlar mehnat shartnomasi bilan tartibga solinadi.

